



Sumáriu Kazu
Tribunál Distritál Oekusi
Abril 2019

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 23

Artigu	Tipu kazu	Númeru
Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika.	17
Artigu 138, 23 KP	Omisídiu simples ho forma tentadu	1
Artigu 259 KP	Danu agravadu	1
Artigu 316 KP	Kontrabandu	4
Totál		23

2. Totál desizaun ne'ebé JSMP monitoriza : 23

Tipu desizaun	Númeru
Pena prizaun (Artigu 66 KP)	2
Suspensaun ba prizaun nia ezekusaun (Artigu 68 KP)	17
Pena multa (Artigu 67 KP)	1
Pena admoestasaun (Artigu 82 KP)	2
Absolve	1
Totál	23

3. Total kazu sira ne'ebé adia tuir JSMP monitorizasaun : 0

Razaun adiamentu	Númeru
Total	0

4. Total kazu sira ne'ebé kontinua prosesu tuir JSMP nia monitorizasaun : 0

B. Deskripsaun sumáriu julgamentu ba desizaun kazu sira

1. Krime ofensa ba integridade física simples ho natureza violénsia doméstika

Nú. Prosesu : 0055/18.OEPMK
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Calisto Tout
Tipu pena : Pena prizaun tinan 1 no suspende ba tinan 1

Iha 08 Abril 2019, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AEB hasoru nia inan, iha Distritu Oekusi.

Akuzasaun Prokuradór

Prokuradór akuza katak iha 23 Agostu 2018, maizumenus iha tuku 13:00 meudia, arguidu nu'udar lezada nia oan mane bo'ot, tuku dala ida iha lezada-nia tilun-hun karuk no kauza lezada sofre moras. Aktu ne'e akontese bainhira arguidu husu osan US\$10.00 atu foto-kopia ninia material eskola nian, maibé lezada la fó tanba osan seidak iha. Kazu ne'e aneksa mós ho relatóriu médiku husi PRADET no fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(c), 35(b) no 36 LKVD.

Produsaun prova sira

Iha julgamentu, arguidu konfesa faktu sira integralmente no arrepende nia hahalok. Arguidu nu'udar estudante iha Dili Institute of Technology, Kampus Rejional Enclave Oekusi (DIT-KREO), laiha rendimentu fixu kada fulan no arguidu sei klosan. Arguidu hateten mós katak nia hatene kuandu baku ka tuku ema bele hetan moras maibé arguidu ho hakarak rasik tuku lezada. Arguidu promete ba tribunál katak sei la halo tan krime hasoru nia inan ka ema seluk iha futuru no depoisde akontese, sira dame malu kedas no hela hamutuk nafatin iha uma ida to'o agora. Arguidu mós foin primeiravés halo krime no mai hatan iha tribunál.

Tribunál presinde lezada nia deklarasaun tanba arguidu rasik konfesa faktu sira totalmente.

Alegasaun final

Prokuradór konsidera arguidu nia hahalok ne'e mal edukadu no tuir loloos arguidu mak tenke proteje lezada nu'udar arguidu nia inan husi kualkér aktu oioin maibé pelu-kontráriu arguidu halo krime hasoru ema ne'ebé merese arguidu nia protesau no respeitu. Arguidu nia hahalok ne'e prenxe duni elementu krime tanba iha produsaun ba prova arguidu rasik konfesa faktu hotu iha akuzasaun. Tanba ne'e husu ba tribunál atu kondena arguidu tuir pena ne'ebé hakerek ona iha artigu 145 KP.

Defeza haktuir katak arguidu konfesa faktu sira hotu iha akuzasaun no arrepende ona nia hahalok. Arguidu promete sei la halo tan krime hasoru nia membru família ka ema seluk no arguidu kolabora diak ho tribunál. Arguidu mós deklara katak sei klosan, dame malu ona ho lezada nu'udar ninia inan no laiha rendimentu fixu kada fulan tanba arguidu hanesan estudante. Tanba ne'e husu ba tribunál atu aplika pena ne'ebé adekua ba arguidu tuir nia sala, naran katak arguidu labele ba prizaun tanba arguidu sei iha tempu atu hadia-an no foin primeiravés halo krime no mai iha tribunál.

Desizaun

Depoide avalia faktu provadu sira ne'ebé prodús durante julgamentu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante no agravante asociadu sira hotu, tribunál kondena arguidu ho pena prizaun tinan ida maibé suspende ba tinan ida.

2. Krime ofensa ba integridade física simples ho natureza violénsia doméstika

Nú. Prosesu	: 0123/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Calisto Tout
Tipu pena	: Pena prizaun tinan 1 fulan 6 suspende ba tinan 2

Iha 08 Abril 2019, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu MB hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 21 Jullu 2018, maizumenus iha tuku 08:00 dadeer, arguidu basa dala rua iha lezada nia hasan karuk no dala ida iha hasan loos. Arguidu rakut lezada nia fuuk to'o monu ba iha rai no tebe tan dala ida iha lezada nia hirus-matan. Aktu sira ne'e rezulta lezada sofre moras. Kazu ne'e aneksa hamutuk ho relatóriu médiku husi PRADET no fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 (a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira hotu iha akuzasaun no arguidu mós arrepende ona nia hahalok. Arguidu serbisu hanesan to'os-na'in, laiha rendimentu fixu kada fulan no iha oan na'in tolu. Arguidu reforsa tan katak dame malu ona ho lezada no moris hamutuk fali ona ho lezada hanesan feen-laen. Arguidu foin primeiravés halo krime hasoru nia feen no mai hatan iha tribunál.

Tribunál presinde lezada nia deklarasaun, tanba arguidu konfesa faktu hotu iha akuzasaun.

Alegasaun final

Prokuradór konsidera arguidu provadu komete krime hasoru lezada bazeia ba arguidu nia deklarasaun. Arguidu ninia hahalok ne'e prenze elementu krime ofensa ba integridade fízika simples ho natureza violénsia doméstika. Aleinde ne'e, krime violénsia doméstika maioria akontese iha Rejiaun Oekusi kompara ho munisípiu sira seluk. Tanba ne'e, husu ba tribunál atu kondena arguidu tuir artigu 145 KP.

Enkuantu, defeza husu ba tribunál atu kondena arguidu ho pena ne'ebé adekuaudu tanba iha produsaun ba prova arguidu kolabora diak ho tribunál no konfesa faktu sira integralmente. Arguidu mós arrepende ona nia hahalok, iha oan na'in tolu no diak malu ona ho lezada. Arguidu foin primeiravés mai hatan iha tribunál.

Desizaun

Depoide avalia faktu sira hotu, tribunál konsidera katak arguidu provadu komete duni krime hasoru lezada tuir faktu sira iha akuzasaun. Bazeia ba faktu provadu hirak ne'e hotu, tribunál kondena arguidu ho pena prizaun tinan ida fulan neen maibé suspende ba tinan rua.

3. Krime ofensa ba integridade fízika simples ho natureza violénsia doméstika

Nú. Prosesu	: 0180/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Calisto Tout
Tipu pena	: Pena prizaun tinan 2 suspende ba tinan 2

Iha 08 Abril 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu IS hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 15 Outubru 2018, maizumenus iha tuku 15:00 lokraik, arguidu fila ba uma ho lanu todan tanba hemu tua-sabu no tuku dala haat iha lezada nia hasan karuk to'o monu ba rai. Arguidu sama dala ida iha lezada nia liman-kabun, hafoin dudu tama lezada ba iha kama okos. Kazu ne'e aneksa hamutuk ho relatóriu médiku husi PRADET no fotografia husi Polísa-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira hotu iha akuzasaun no arrepende ninia hahalok. Arguidu serbisu hanesan to'ós-na'in, laiha rendimentu fixu kada fulan no iha oan na'in rua. Arguidu foin primeiravés halo krime no mai hatan iha tribunál. Arguidu diak malu kedas ho lezada hafoin akontesimentu no moris hamutuk nafatin ho lezada hanesan feen ho laen.

Tribunál presinde audisaun ba lezada nia deklarasaun inklui testemuña tanba iha produsaun ba prova arguidu rasik konfesa faktu hotu iha akuzasaun.

Alegasaun final

Prokuradór konsidera arguidu provadu komete krime ofensa ba integridade fízika simples hasoru nia feen. Tuir loloos arguidu mak tenke proteje lezada husi kualker aktu hotu-hotu. Maibé arguidu mak komete fali krime hasoru lezada ne'ebé fízikamente arguidu iha forsa boot liu. Tanba ne'e husu ba tribunál atu kondena arguidu tuir akuzasaun prokuradór.

Entretantu, defeza husu ba tribunál atu kondena arguidu ho pena ne'ebé adekuaudu tanba arguidu konfesa faktu sira integralmente, arrepende ona nia hahalok, iha oan na'in rua, diak malu ona ho lezada no foin primeiravés mai hatan iha tribunál.

Desizaun

Tribunál konklui katak arguidu provadu komete duni krime hasoru lezada. Bazeia ba faktu provadu hirak ne'e no sirkunstánsia atenuante sira hotu hanesan arguidu konfesa, arrepende ona nia hahalok, foin primeiravés mai hatan iha tribunál, iha oan na'in-rua no diak malu ona ho lezada, nune'e tribunál kondena arguidu ho pena prizaun tinan rua suspende ba tinan rua.

4. Krime ofensa ba integridade fízika simples ho natureza violénsia doméstika

Nú. Prosesu	: 0137/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena multa US\$150.00

Iha 09 Abril 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JT (Membro UPF) hasoru nia feen EB, iha Distritu Oekusi.

Akuzasaun Prokuradór

Prokuradór akuza katak iha 02 Agostu 2018, maizumenus iha tuku 09.00 dadeer, arguidu tuku lezada dala rua iha ulun no rezulta lezada nia ulun hetan moras no bubu. Aktu ne'e akontese bainhira lezada diskute malu ho arguidu nia aman. Kazu ne'e aneksa ho relatóriu médiku husi PRADET no fotografia husi Polísa-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to' o tinan 3 ka multa no konjuga ho artigu 2, 3(a), 35(b) no 36 LKVD.

Produsaun prova sira

Arguidu konfesa faktu sira integralmente no deklarata katak arrepende nia hahalok. Arguidu konsiente katak baku ka halo ofensa hasoru ema bele hetan moras. Arguidu promete ba tribunál katak sei la halo tan krime hasoru nia feen ka ema seluk iha futuru no depoisde akontese sira dame malu kedas no moris hamutuk to' o agora. Arguidu mós foin primeiravés halo krime no mai iha tribunál. Arguidu serbisu hanesan membru UPF ho rendimentu US\$522.00 kada fulan no iha oan na'in haat.

Tribunál presinde lezada nia deklarasaun tanba arguidu konfesa faktu integralmente no husi parte prokuradór no defeza konkorda ho despaixu husi tribunál.

Alegasaun final

Prokuradór haktuir katak arguidu nu'udar membru polísia no tuir loloos arguidu mak tenke atua kualkér problema laho violénsia tanba polísia hatene diak liu sobre aktu krime hirak ne'e. Infelizmente arguidu halo atusaun ho hahalok brutalismu hodi tuku lezada iha ulun dala rua. Arguidu manifesta intensaun maka'as atu tuku lezada mezmú arguidu hatene katak fízikamente lezada nia forsa la to' o atu hasoru arguidu. Tanba ne'e, husu ba tribunál atu kondena arguidu tuir akuzasaun prokuradór.

Defeza haktuir katak konfesa faktu sira hotu iha akuzasaun no arrepende ona ba nia hahalok. Defeza reforsa tan katak arguidu promete sei la halo tan krime hasoru nia membru família ka ema seluk no arguidu kolabora diak ho tribunál. Arguidu iha oan na'in haat no serbisu hanesan membru UPF no iha responsavel ba família. Tanba ne'e, husu ba tribunál atu aplika pena ne'ebé adekua ba arguidu tuir nia sala.

Desizaun

Depoisde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena multa US\$150.00 ne'ebé sei selu US\$1.00 kada lora durante lora 150. Tribunál mós fiksa pena alternativa durante lora 100 iha prizaun bainhira arguidu la kumpri pena multa refere. Tribunál mós kondena arguidu selu kustu judisiál US\$30.00.

5. Krime ameasa no ofensa ba integridade fízika simples ho natureza violénsia doméstika

Nú. Prosesu	: 0135/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena prizaun tinan 3 suspende ba tinan 3

Iha 09 Abril 2019, Tribunál Distritál Oekusi prezide tentativa konsiliaun ba krime ameasa no kontinua julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AH hasoru nia feen (TL) ho nia oan (SLQ) tinan 9, no MEQ (tinan 13), iha Distritu Oekusi.

Akuzasaun Prokuradór

Prokuradór akuza katak iha 31 Jullu 2018, maizumenus iha tuku 22:00 kalan, arguidu uza ai-turi baku lezada dala ida iha hirus-matan no foti alu atu baku tan lezada maibé la konsege tanba lezada satan ho liman rua rezulta moras. Arguidu mós uza nia sintu baku lezadu SLQ dala haat iha kelen loos no dala haat iha ain-kabun loos, kauza bubu no moras. Arguidu mós kontinua uza ai-turi baku tan arguidu nia-oan feto dala rua iha liman belar parte loos no kauza lezada sofre moras.

Arguidu mós ameasa lezada/u sira katak nia sei taa mate sira hotu, tanba ne'e lezada sira no lezadu sente tauk no halai ba subar tiha. Kazu ne'e aneksa hamutuk ho relatóriu médiku husi PRADET no fotografia husi Polísa-VPU.

Prokuradór akuza arguidu kontra artigu 157 KP kona-ba ameasa hasoru lezadu no lezada sira ho moldura Penál to'o tinan 2 ka multa. Prokuradór mós akuza arguidu kontra artigu 145 KP kona-ba ofensa ba integridade fízika simples hasoru lezadu no lezada sira ho moldura penál to'o tinan 3 ka multa no konjuga ho artigu 2, 3(a,c), 35(b) no 36 LKVD.

Antes tama ba produsaun ba prova, tribunál halo tentativa konsiliaun ba arguidu no lezadu no lezada sira. Iha prosesu konsiliaun ne'e, lezadu no lezada sira hakarak deziste sira nia keixa kona-ba krime ameasa tanba dame-malu ona. Arguidu konkorda ho lezadu no lezada sira nia pedidu ne'e. Bazeia ba akordu hosi parte rua no pedidu dezisténsia hosi lezadu no lezada sira, tribunál omologa akordu dame entre parte sira kona-ba krime ameasa. Tribunál kontinua halo julgamentu ba krime ofensa ba integridade fízika simples ho natureza violénsia doméstika.

Produsaun ba prova sira

Arguidu konfesa integralmente ba faktu hotu iha akuzasaun no arguidu mós arrepende ona ninia hahalok. Arguidu konsiente katak baku ema seluk ka membru família sira bele hetan kanek ka kauza moras maibé arguidu ho hakarak rasik baku lezadu no lezada sira. Arguidu serbisu hanesan to'os-na'in, laiha rendimentu fixu kada fulan no iha oan na'in lima. Arguidu deklarara katak dame malu ona ho lezadu no lezada sira. Arguidu mós deklarara katak antes ne'e iha tinan 2004, arguidu halo ona krime hasoru nia feen no tribunál omologa sira nia kazu.

Tribunál presinde lezadu no lezada sira nia deklarasaun tanba iha produsaun ba prova arguidu rasik konfesa faktu sira hotu iha akuzasaun.

Alegasaun final

Prokuradór konsidera arguidu provadu komete krime hasoru lezadu no lezada sira bazeia ba konfisaun arguidu nian. Prokuradór haktuir tan katak arguidu nia hahalok ne'e prenze duni elementu krime ofensa ba integridade fízika simples ho natureza violénsia doméstika no krime hirak ne'e maioria akontese iha Regiaun Oekusi kompara ho munisípiu sira seluk. Arguidu iha intensaun maka'as atu halo agresaun fízika hasoru lezadu no lezada sira no tuir loloos arguidu mak tenke proteje nia membru família sira husi kualkér aktu ruma. Tanba ne'e husu ba tribunál atu kondena arguidu tuir artigu 145 KP.

Iha parte seluk, defeza haktuir katak arguidu konfesa faktu hotu iha akuzasaun, arrepende ona ba ninia hahalok, diak malu ona ho lezada, iha oan na'in lima no arguidu mak iha responsabilidade ba nia família. Tanba ne'e husu ba tribunál atu aplika pena ne'ebé adekuaudu tuir arguidu nia sala.

Desizaun

Tribunál prova katak arguidu provadu komete duni krime hasoru nia feen ho nia oan na'in rua. Bazeia ba faktu provadu sira ne'e no sirkunstánsia atenuante hirak ne'e hotu no tribunál kondena arguidu ho pena prizaun tinan 3 maibé suspende ba tinan 3.

6. Krime ofensa ba integridade fízika simples ho natureza violénsia doméstika

Nú. Prosesu : 0032/18.OEPMK
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun tinan 1 suspende ba tinan 1

Iha 10 Abril 2019, Tribunál Distritál Oekusi prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu RC hasoru nia oan fetu AC (tinan 16) no NAC (tinan 14), iha Distritu Oekusi.

Akuzasaun Prokuradór

Prokuradór akuza katak iha 27 Juñu 2018, maizumenus iha tuku 08.00 dadeer, arguidu lori ai-sanak guavas nian baku dala rua iha lezada AC nia-kotuk laran no dala rua iha kanuruk no rezulta lezada sofre moras. Arguidu mós lori ai-sanak guavas nian baku dala ida iha lezada NAC nia-ain kabun karuk no basa dala ida iha kanuruk no rezulta lezada sofre moras. Arguidu komete aktu ne'e bainhira haree katak tuku 08:00 dadeer ona maibé lezada sira seidak preparan atu hariis aba eskola. Kazu ne'e aneksa mós ho relatóriu médiku husi Pradet no fotografia husi Polísa-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(c) no 35(b) no 36 LKVD.

Produsaun prova

Arguidu konfesa faktu sira iha akuzasaun integralmente no deklara katak arrepende ninia hahalok. Arguidu deklara katak baku ema seluk nia isin bele rezulta moras fiziku maibé arguidu halo nafatin aktu ne'e. Arguidu promete ba tribunál katak sei la halo tan krime hasoru nia oan sira ka ema seluk. Arguidu mós deklara katak depoisde akontese sira dame malu kedas no moris hamutuk nafatin nu'udar família ida. Arguidu serbisu hanesan to'os-na'in, laiha rendimentu fixu kada fulan no iha oan na'in tolu no primeiravés mai tribunál.

Tribunál presinde audisaun ba lezada sira nia deklarasaun tanba iha audensia julgamentu arguidu konfesa faktu sira integralmente no prokuradór no defeza konkorda ho pedidu husi tribunál.

Alegasaun finál

Prokuradór haktuir katak arguidu nu'udar lezada nia oan rasik no tuir loloos arguidu proteje lezada sira nu'udar nia oan. Tanba ne'e husu ba tribunál atu kondena arguidu tuir pena ne'ebé hakerek ona iha artigu 145 KP.

Entretantu defeza haktuir katak arguidu konfesa faktu sira hotu iha akuzasaun, arrepende nia hahalok no promete sei lahalo tan krime hasoru nia membru família ka ema seluk. Arguidu mós kolabora diak ho tribunál, iha oan na'in tolu, serbisu hanesan to'os-na'in no laiha rendimentu fixu kada fulan. Tanba ne'e husu ba tribunál atu aplika pena ne'ebé kmaan ba arguidu tuir nia sala.

Desizaun

Depoide avalia faktu hotu, tribunál prova katak arguidu halo duni agresau fízika hasoru nia oan na'in rua. Tribunál konsidera katak mezmú arguidu nia atuasaun ho motivasaun diak tanba hakarak orienta nia-oan sira tenke ba eskola atu asegura sira nia futuru ne'ebé diak maibé aprosimasaun ne'e la bele ho violénsia. Tribunál reafirma katak tuir loloos arguidu bele utiliza maneira seluk atu eduka labarik sira la'os uza violénsia. Bazeia ba faktu provadu sira ne'e no sirkunstánsia hotu, kondena arguidu ho pena prizaun tinan ida suspende ba tinan ida.

7. Krime ofensa ba integridade fízika simples ho natureza violénsia doméstika

Nú. Prosesu : 0110/18.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Calisto Tout
Tipu pena : Pena prizaun tinan 1 suspende ba tinan 1

Iha 10 Abril 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AG hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 17 Jullu 2018, maizumenus iha tuku 18:30 lokraik, arguidu basa dala ida iha lezada ninia-ibun no rezulta bubu no moras. Kazu ne'e aneksa hamutuk ho relatóriu médiku husi PRADET no fotografia husi Polísa-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Arguidu konfesa integralmente ba faktu hotu iha akuzasaun no deklara katak arrepende nia hahalok. Arguidu konsiente katak baku ema ka membru membru família sira bele hetan kanek ka moras. Arguidu serbisu hanesan funsionáriu iha kompañia WIKA Karya ho rendimentu kada fulan US\$200.00 no iha oan na'in lima. Arguidu mós deklara katak dame malu ona ho lezada no moris hamutuk nafatin to'o agora. Antes ne'e, iha tinan 2015 arguidu envolve ona krime danu simples no hetan pena multa US\$60.00.

Tribunál presinde audisaun ba lezada nia deklarasaun, tanba iha produsaun ba prova arguidu rasik konfesa faktu sira hotu iha akuzasaun.

Alegasaun final

Prokuradór konsidera arguidu nia hahalok ne'e prenze duni elementu sira hosi krime ofensa ba integridade física simples bazeia ba arguidu nia deklarasaun. Tanba ne'e husu ba tribunál atu kondena arguidu tuir artigu 145 KP.

Defeza konsidera arguidu konfesa faktu sira hotu iha akuzasaun sein rezerva no arguidu mós arrepende ona nia hahalok. Arguidu dame malu ona ho lezada no moris hamutuk nafatin iha uma ida no sira iha oan na'in lima. Arguidu mak responsavel primária ba família sira iha uma laran. Arguidu sei iha tempu para hadia-an no promete ona ba tribunál katak sei la repete tan hahalok hanesan iha futuro. Tanba ne'e, husu ba tribunál atu aplika pena adekua ba arguidu.

Desizaun

Depoide avalia faktu hotu, tribunál prova katak arguidu basa lezada dala ida ihaibun no rezulta lezada hetan bubu no moras. Bazeia ba faktu provadu sira ne'e, tribunál kondena arguidu ho pena prizaun tinan ida suspende tinan ida no selu kustu judisiál US\$20.00.

8. Krime kontrabandu

Nú. Prosesu	: 0196/17.OESIC
Kompozisaun Tribunál	: Kolektivu
Juis	: Dr. João Ribeiro, Dra. Sribuana da Costa no Dr. Eusébio Victor Xavier
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena prizaun tinan 2 suspende ba tinan 2

Iha 11 Abril 2019, Tribunál Distritál Oekusi prezide julgamentu leitura akordaun kazu ba krime kontrabandu ne'ebé envolve arguidu Abilio Jose Caet hasoru Estadu RDTL, iha Suku Bobometo, Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 26 Setembru 2017, maizumenus tuku 17:30 lokraik, arguidu lori motor Honda Revo ida hosi Indonezia tama mai Timor Leste liuhosi fronteira Mota Noel Ekat. Arguidu la liu husi Alfandega atu selu taxa hodi hamosu prejuizu ba Estadu RDTL. Motor refere arguidu hola ho folin US\$460.00.

Prokuradór akuza arguidu kontra artigu 316 KP kona-ba krime kontrabandu ho moldura penál tinan 2 to'o tinan 6 prizaun ka multa.

Produsaun ba prova sira

Arguidu konfesa faktu sira hotu iha akuzasaun, arrepende ona nia hahalok no promete sei la repete hahalok hanesan iha futuro. Arguidu deklara katak primeiravés halo krime no mai hatan iha tribunál no iha oan na'in ida. Arguidu serbisu hanesan to'os-na'in no laiha rendimentu fiksi.

Tribunál presinde audisaun ba testemuña hosi Unidade Polísia Fronteira (UPF) nia depoimentu tanba iha produsaun ba prova arguidu rasik konfesa faktu hotu iha akuzasaun.

Alegasaun final

Prokuradór konsidera arguidu provadu komete krime kontrabandu ne'ebé konfirmadu hosi arguidu rasik. Krime kontrabandu akontese barak tebes iha Rejiaun Oekusi. Arguidu sira desvia taxa ba Estadu, nune'e hamosu prejuizu ba Estadu RDTL. Tanba ne'e husu ba tribunál atu aplika pena prizaun ba arguidu tuir artigu 316 KP.

Defeza husu ba tribunál atu aplika pena ne'ebé adekuaudu tuir arguidu nia sala ho konsiderasaun katak arguidu konfesa faktu hotu iha akuzasaun no arrepende ona nia hahalok. Arguidu hatudu kolaborasaun diak ho tribunál no laiha rendimentu fixu kada fulan. Arguidu promete sei la repete tan hahalok hanesan iha futuru no arguidu iha oan na'in ida no sei iha tempu atu hadia-an.

Desizaun

Bazeia ba faktu hirak ne'ebé prodús durante julgamentu, tribunál tetu sirkunstánsia agravante no atenuante hirak ne'e hotu no kondena arguidu ho pena prizaun tinan rua suspende ba tinan rua. Tribunál mós sei devolve fali motor refere ba arguidu kuandu arguidu selu ona taxa ba Estadu RDTL.

9. Krime kontrabandu

Nú. Prosesu	: 0201/17.OESIC
Kompozisaun Tribunál	: Kolektivu
Juis	: Dr. João Ribeiro, Dra. Sribuana da Costa no Dr. Eusébio Victor Xavier
Prokuradór	: Dr. Mateus Nesi
Defeza	: Dr. Calisto Tout
Tipu pena	: Pena prizaun tinan 2 suspende ba tinan 2

Iha 11 Abril 2019, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguidu João Paulo Mambares Quefi hasoru Estadu RDTL, iha Suku Bobometo, Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 15 Setembru 2017, maizumenus iha tuku 13:30 meudia, arguidu ilegalmente hatama motor 1 ho marka Yamaha RX King 133 cc ho dokumentu kompletu iha fronteira Noel Ekat entre Indonezia ho Timor-Leste. Motor ne'e hatama mai teritoriu Timor-Leste la liuhosi Alfandega atu selu taxa nune'e hamosu prejuizu ba Estadu RDTL.

Prokuradór akuza arguidu kontra artigu 316 KP kona-ba krime kontrabandu ho moldura penál tinan 2 to'o tinan 6 prizaun ka multa.

Produsaun ba prova sira

Arguidu konfesa faktu hotu iha akuzasaun, arrepende nia hahalok no deklara katak selu ona taxa liuhosi caixa prokuradór nian. Arguidu hatene katak hahalok hanesan ne'e ladiak no kontra lei maibé arguidu prátika nafatin. Arguidu serbisu hanesan to'os-na'in, iha oan na'in ida no laiha

rendimentu fixu kada fulan. Arguidu promete sei la repete tan hahalok hanesan iha futuru. Arguidu deklar katak Polísia UPF halo kapturasaun bainhira arguidu lori motor tama mai Timor-Leste.

Tribunál presinde audisaun ba testemuña husi Unidade Polísia Fronteira (UPF) nia depoimentu, tanba iha produsaun ba prova arguidu rasik konfesa faktu hotu iha akuzasaun.

Alegasaun final

Prokuradór konsidera arguidu provadu prense duni elementu krime kontrabandu tuir faktu hotu ne'ebé hakerek iha akuzasaun prokuradór nian. Prokuradór subliña katak arguidu halo krime ne'e ho livre, deliberada, konsientimente, aproveita situasaun no sistema kontrola hosi flonteira ne'ebé frazil hodi importa sasan ilegal no faan tutan hodi hariku-an ho maneira ne'ebé la aproriadu no la tuir lei no hamosu prejuizu ba Estadu RDTL. Tanba ne'e husu ba tribunál atu kondena arguidu tuir artigu 316 KP.

Enkuantu defeza haktuir katak arguidu konfesa faktu hotu iha akuzasaun, arrepende ona nia hahalok, kolabora diak ho tribunál no selu ona taxa liuhosi konta bankaria ministériu públiku nian. Arguidu to'os-na'in, laiha rendimentu fixu kada fulan no iha oan na'in ida. Tanba ne'e husu ba tribunál atu aplika pena ne'ebé adekuadu ba arguidu tuir nia sala.

Desizaun

Depoizde avalia faktu sira ne'ebé prodús durante julgamentu, tribunál prova katak arguidu provadu komete duni krime kontrabandu. Bazeia ba faktu provadu hirak ne'e no sirkuanstánsia asociadu sira hotu, tribunál kondena arguidu ho pena prizaun tinan rua suspende ba tinan rua. Tribunál mós sei devolve fali motor refere ba arguidu kuandu arguidu hatudu dokumentu komprovadu ba iha tribunál.

10. Krime tentativa omisídiu simples

Nú. Prosesu : 0048/17.OEPMK
Kompozisaun Tribunál : Kolektivu
Juis : Dr. João Ribeiro, Dra. Sribuana da Costa no Dr. Eusébio Victor Xavier
Prokuradór : Dr. Mateus Nesi
Defeza : Dr. Calisto Tout
Tipu pena : Pena prizaun ho suspensaun ba arguidu na'in tolu

Iha 12 Abril 2019, Tribunál Distritál Oekusi preside julgamentu leitura akordaun ba krime tentativa omisídiu simples ne'ebé envolve arguidu Candido Queno, Eugebio de Jesus Lelan, Cipriano Sufa no Antonio Mario Lelan hasoru lezadu Manuel Antonio Caba Eco, iha Suku Costa, Sub-distritu Pante-makasar, Distritu Oekusi.

Akuzasaun Prokuradór

Prokuradór akuza katak iha 01 Outubru 2017, maizumenus iha tuku 03:00 madrugada, arguidu na'in 4 hamutuk tebe no uza fatuk tuku iha lezadu nia kanuruk, lori katana taa lezadu nia ulun no kabaas. Agresaun hirak-ne'e rezulta lezadu hetan kanek iha ulun no kabaas, mean no bubu iha

kanuruk no kotuk laran. Krime ne'e akontese sein motivu ne'ebé klaru. Kazu ne'e anexa ho relatóriu médiku husi Ospital Referral Oekusi no fotografia husi Polísia.

Prokuradór akuza arguidu na'in 4 kontra artigu 138 no 23 Kódigu Penál kona-ba krime omisídiu simples ho forma tentadu ho moldura penál tinan 8 to'o tinan 20 prizaun.

Produsaun ba prova sira

Arguidu na'in haat konfesa faktu sira parsialmente iha akuzasaun prokuradór nian. Arguidu Candido deklara katak iha tuku 02:30 madrugada, arguidu sira fila husi festa halibur maun-alin nian iha Mahatan no foin la'o maizumenus 50 km, mosu konfrontasaun husi parte lezadu ne'ebé hamutuk ho nia kolega sira tuda no duni arguidu na'in 4 ho família sira. Bainhira lezadu duni arguidu sira to'o iha baliza entre arguidu sira ho lezadu nian no lezadu mak ba husu atu sira tuku malu maibé *gentle* de'it (ida hasoru ida).

Hafoin arguidu Candido haksoit ba atu tebe lezadu maibé la kona no lezadu hakuak metin arguidu no sira na'in rua monu hotu ba rai. Kuandu sira monu ona iha rai, arguidu Eugebio lori katana taa iha lezadu nia ulun no iha kabaas. Arguidu arrende no foin halo krime no mai hatan iha tribunál. Arguidu iha oan na'in ida, serbisu hanesan seguransa iha PAX ho rendimentu kada fulan US\$125.00, no arguidu ho lezadu nia relasaun hanesan rian.

Arguidu Eugebio deklara katak bainhira to'o iha fatin akontesimentu no lezadu to'o ba dudu de'it arguidu nia inan, hafoin arguidu lori katana taa iha lezadu nia kanuruk no kona mós iha lezadu nia kabaas bainhira lezadu ho arguidu Candido monu ona iha rai. Arguidu haree lezadu mak iha arguidu Candido nia leten. Arguidu primeiravés halo krime mai hatan iha tribunál no arrende ona ba nia hahalok. Enkuantu arguidu Cipriano deklara katak iha momentu ne'eba nia laiha fatin akontesimentu tanba *piket* kalan, halo seguransa privadu iha ONG-FPWO.

Arguidu Cipriano deklara katak iha altura ne'eba, arguidu hetan *pikete* kalan halo seguransa privadu iha Edifisiu ONG Forum Peduli Wanita Oekusi (FPWO) iha Numbey no arguidu rasik la hatene kona-ba akontesimentu refere. Arguidu haktuir tan katak serbisu hanesan seguransa iha ONG-FPWO ho rendimentu kada fulan 135.00.

Entretantu arguidu Antonio Mario Lelan deklara katak sira duni malu to'o iha fatin akontesimentu no arguidu halai liu tiha maizumenus 50km. Arguidu deklara katak nia hare duni arguidu Candido mak tebe no arguidu Eugebio mak taa ho katana. Arguidu hatutan katak iha momentu ne'eba arguidu la uza fatuk tuku iha lezadu nia kanuruk no kotuk laran tanba arguidu hamrik dook-maizumenus 50km. Arguidu mós deklara katak iha momentu ne'ebá nia la hare Cipriano no arguidu foin mai iha tribunál. Arguidu laiha rendimentu fixu kada fulan tanba serbisu hanesan to'os-na'in no iha oan na'in 1.

Iha parte seluk, lezadu deklara katak kuandu sira duni malu no lezadu halai ba atu sorik sira no konsege hapara tiha ema sira husi parte leten fila fali ba festa no lezadu mak kontinua ba hasoru nia rian sira. Bainhira to'o, arguidu Candido haksoit tebe lezadu maibé la kona no hakuak fali lezadu to'o monu hotu ba iha rai, hafoin arguidu Eugebio lori katana taa dala ida iha ulun no dala ida iha kabaas. Aleinde ne'e, Cipriano uza fatuk tuku dala ida iha kanuruk no arguidu Antonio Mario uza fatuk tuku dala rua iha kotuk laran, tebe dala barak iha lezadu nia kotuk laran no

kidun. Lezadu konfirma hotu faktu sira iha akuzasaun no konfirma katak arguidu sira ho lezadu nia relasaun nu'udar rian. Lezadu haktuir tan katak iha momentu ne'ebá, lezadu no testemuña Job mak duni arguidu sira maibé iha dalan klaran lezadu haruka testemuña Job fila fali no lezadu mesak mak kontinua duni tuir arguidu sira to'o hetan agresaun refere.

Testemuña Job Romea da Cruz Salu depoimenta katak nia hamutuk ho lezadu mak duni arguidu sira maibé lezadu haruka nia fila. Nune'e lezadu fila fali ba festa no la hatene kona-ba akontesimentu refere.

Enkuantu testemuña seluk, Emiliana Elu nu'udar arguidu Eugebio no Antonio Lelan sira nia inan depoimenta katak kuandu halai besik sira nia uma no testemuña sai ba no ko'alia ba lezadu katak diak liu ita fahe malu de'it no aban mak ita rezolve tanba agora sei kalan. Tanba ne'e lezadu kaer testemuña nia liman dulas hisik testemuña monu tun iha rai no desmaia hafoin arguidu sira no lezadu baku malu.

Alegasaun final

Prokurador konsidera faktu sira ne'ebé hakerek ona iha akuzasaun ne'e loos hotu bazeia ba deklarasaun balun ne'ebé prodús durante iha produsaun ba prova, mezmú arguidu balun nega faktu no konfesa parsialmente maibé iha relatóriu médiku. Prokurador intende katak arguidu sira ho lezadu hanesan rian no antes aktu ne'e akontese sira iha ona problema. Tanba ne'e husu ba tribunál atu kondena arguidu sira tuir akuzasaun.

Defeza argumenta katak arguidu sira onestu perante ba tribunál. Arguidu Candido mak iha oan na'in ida no sira seluk sei klosan. Arguidu Candido no Eugebio arrepende ona sira nia hahalok no arguidu sira laiha rendimentu fixu kada fulan tanba serbisu hanesan to'os-na'in. Antes ne'e arguidu sira tenta atu dame maibé la konsege tanba lezadu husu indemnizasaun sivil hamutuk osan US\$2,000.00. Tanba ne'e, defeza solisita ba tribunál atu aplika pena ne'ebé adekuaudu tuir arguidu sira nia sala ho konsiderasaun katak arguidu sira foin sae no sei iha tempu para hadia sira nia aan iha futuru.

Ba arguidu Cipriano Sufa, defeza husu tribunál atu absolve tanba iha momentu akontesimentu ne'e arguidu laiha fatin tanba *pikete* kalan seguransa privadu ba edifisiu FPWO iha Numbey. Nune'e mós ba arguidu Antonio Mario Lelan, defeza husu ba tribunál atu absolve tanba iha momentu ne'e arguidu rasik halai liu tiha maizumenus 50 km no arguidu deklarata katak nia la uza fatuk tuku lezadu.

Desizaun

Bazeia ba sirkunstansia agravante no atenuante hirak ne'e hotu, tribunál konklui prosesu ne'e no kondena arguidu Eugebio ho pena prizaun tinan tolu, arguidu Cipriano ho arguidu Candido tribunál kondena sira ho pena prizaun tinan rua maibé suspende to'o tinan tolu. Entretantu arguidu Antonio, tribunál kondena ho pena prizaun tinan rua suspende ba tinan rua. Tribunál mós kondena arguidu Candido no Cipriano ida-idak selu kusta judisial US\$20.00.

11. Krime kontrabandu

Nú. Prosesu : 0119/17.OESIC
Kompozisaun Tribunál : Kolektivu
Juis : Dr. João Ribeiro, Dra. Sribuana da Costa no Dr. Eusébio Victor

Xavier
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena efetiva prizaun tinan 2

Iha 12 Abril 2019, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguidu Lambertus Elu hasoru Estadu RDTL, iha Suku Bobometo, Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 14 Juñu 2017, maizumenus tuku 17:30 lokraik, arguidu na'ok motor bebek Honda Revo ida no Honda Meo ida iha teritoriu Indonezia no hatama mai Timor Leste liuhosi fronteira Mota Noel Ekat. Arguidu sira hatama motor hirak ne'e la liuhosi Alfandega atu selu taxa hodi hamosu prejuizu ba Estadu RDTL.

Prokuradór akuza arguidu kontra artigu 316 KP kona-ba krime kontrabandu ho moldura penál tinan 2 to'o tinan 6 prizaun ka multa.

Antes ne'e mós, prokuradór akuza arguidu kontra artigu 252 KP kona-ba krime furtu agravadu ho moldura penál tinan 2 to'o tinan 8 prizaun. Maibé tribunál altera tiha artigu refere tanba konsidera arguidu la na'ok iha teritoriu Timor-Leste no akuza deit arguidu kontra krime kontrabandu.

Produsaun ba prova sira

Iha julgamentu arguidu konfesa faktu hotu iha akuzasaun, arrepende nia hahalok no promete sei la repete hahalok hanesan iha futuru. Arguidu deklara katak arguidu kumpri ona iha prizaun preventiva durante tinan rua. Arguidu serbisu hanesan to'os-na'in, laiha rendimentu fiksi kada fulan no iha oan na'in tolu.

Tribunál presinde audisaun ba testemuña hosi Unidade Polísia Fronteira (UPF) tanba arguidu rasik konfesa faktu hotu iha akuzasaun.

Alegasaun final

Prokuradór konsidera arguidu provadu komete krime kontrabandu bazeia ba deklarasaun husi arguidu rasik. Prokuradór afirma katak krime kontrabandu barak liu akontese iha Rejiaun Oekusi ida-ne'e prejudika tebes Estadu tanba arguidu sira laselu taxa ba Estadu RDTL. Tanba ne'e husu ba tribunál atu aplika pena prizaun ba arguidu tuir artigu 316 KP.

Defeza haktuir katak arguidu konfesa faktu hotu iha akuzasaun, arrepende ona nia hahalok no hatudu kolaborasaun diak ho tribunal. Arguidu laiha rendimentu fixu kada fulan, promete sei larepete tan hahalok hanesan iha futuru no iha oan na'in tolu. Defeza reforsa liután katak deposesde primeiru interrogatóriu, arguidu hetan medida koasaun hodi kumpri iha prizaun preventiva durante tinan rua. Tanba ne'e, defeza husu ba tribunál atu aplika pena ne'ebé kmaan ba arguidu.

Depoisde alegasaun finál, tribunál halo alterasaun ba medida koasaun prizaun preventiva ne'ebé aplika ba arguidu hodi hasai kedas arguidu hosi prizaun no aplika deit medida koasaun TIR (Termu ba Identidade no Rezidência) ba arguidu.

Desizaun

Tribunál konsidera katak arguidu provadu komete krime kontrabandu tanba iha produsaun ba prova arguidu rasik konfesa faktu hotu iha akuzasaun prokuradór. Bazeia ba faktu provadu sira ne'e tribunál kondena arguidu ho pena prizaun efetiva tinan rua. Maibé tanba antes ne'e arguidu hetan medida koasaun prizaun preventiva liu ona tinan rua, nune'e tribunál liberta kedas arguidu. Tribunál mós sei devolve fali motor Mio ba nia na'in tanba iha dokumentu kompletu. Entretantu ba motor bebek Honda-Revo sei monu ba Estadu RDTL tanba laiha ema ida mak prova katak motor ne'e ema seluk nian.

12. Krime kontrabandu

Nú. Prosesu	: 0219/17.OESIC
Kompozisaun Tribunál	: Kolektivu
Juis	: Dr. João Ribeiro, Dra. Sribuana da Costa no Dr. Eusébio Victor Xavier
Prokuradór	: Dr. Mateus Nesi
Defeza	: Dr. Calisto Tout
Tipu pena	: Pena prizaun tinan 1 suspende ba tinan 1 ba kada arguidu no arguida

Iha 12 Abril 2019, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguida Maria Oqui, Maria Saco, Filomena Suni no arguidu Agostinho Quelo hasoru Estadu RDTL, iha Suku Bobometo, Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 03 Dezembru 2017, maizumenus iha tuku 21:00 kalan, arguidu no arguida sira hamutuk hatama sasan ilegál liuhosi fronteira Oesilo entre Indonezia ho Timor-Leste. Sasan sira ne'ebé arguidu sira hatama mak hanesan gazolina litru 1,030, gazoel litru 305 no mina rai litru 215. Arguidu sira kompra sasan sira ne'e ho total osan hamutuk US\$775.00.

Prokuradór akuza arguidu no arguida sira kontra artigu 316 KP kona-ba krime kontrabandu ho moldura penál tinan 2 to'o tinan 6 prizaun ka multa.

Produsaun ba prova sira

Iha julgamentu, arguidu no arguida sira konfesa faktu hotu iha akuzasaun, arrepende ona sira nia hahalok no deklara katak selu ona taxa ba iha konta bankaria ministériu públiku. Arguidu no arguida sira hatene katak hahalok hanesan ne'e la diak no kontra lei. Arguidu/a sira serbisu hanesan to'os-na'in no laiha rendimentu fixu kada fulan no promete sei la repete tan hahalok hanesan iha futuru. Arguidu no arguida sira deklara katak Polísia UPF mak halo kapturasaun ba arguidu no arguida sira.

Tribunál presinde audisaun ba testemuña husi Unidade Polísia Fronteira (UPF) nia depoimentu, tanba iha produsaun ba prova arguidu no arguida sira rasik konfesa faktu hotu iha akuzasaun.

Alegasaun finál

Prokuradór konsidera arguidu no arguida sira provadu komete krime kontrabandu tuir faktu sira iha akuzasaun. Prokuradór fiar katak arguidu no arguida sira halo krime ne'e ho livre, deliberada, konsientimente, aproveita situasaun kalan atu fasil importa sasan ilegal no faan sasan ilegal hodi hariku-an no hamosu prejuizu ba Estadu RDTL. Tanba ne'e husu ba tribunál atu kondena arguidu no arguida sira tuir artigu 316 KP.

Enkuantu defeza haktuir katak arguidu no arguida sira konfesa faktu hotu iha akuzasaun, arrepende ona sira nia hahalok, kolabora ho tribunál no selu ona taxa ba iha konta bankaria ministériu públiku. Arguidu no arguida sira serbisu nu'udar to'os-na'in no laiha rendimentu fixu kada fulan. Tanba ne'e husu ba tribunál atu konsidera sirkunstánsia atenuante sira ne'e no aplika pena ne'ebé adekua ba arguidu no arguida sira.

Desizaun

Depoide avalia faktu hotu, tribunál prova katak arguidu no arguida sira komete duni krime tuir faktu sira iha akuzasaun. Bazeia ba prova sira ne'e, tribunál kondena arguidu no arguida sira ho pena prizaun tinan ida maibé suspende ba tinan ida ba kada arguidu no arguida sira.

13. Krime danu agravadu

Nú. Prosesu : 0032/17.OEPMK
Kompozisaun Tribunál : Kolektivu
Juis : Dr. João Ribeiro, Dra. Sribuana da Costa no Dr. Eusébio Victor Xavier
Prokuradór : Dr. Mateus Nesi
Defeza : Dr. Calisto Tout
Tipu pena : Pena prizaun tinan 1 suspende ba tinan 1

Iha 12 Abril 2019, Tribunál Distritál Oekusi prezide julgamentu leitura akordaun danu agravadu ne'ebé envolve arguidu Agosto Cope hasoru Estadu RDTL, iha Suku Costa Sub-distritu Pante-makasar Distritu Oekusi.

Akuzasaun Prokuradór

Prokuradór akuza katak iha 30 Juñu 2017, maizumenus iha tuku 09:00 dadeer, arguidu uza fatuk tuda rahun vidru Eskola Sekundáriu Públiku Palaban no rezulta vidru ida rahun totál. Aktu ne'e akontese kuandu arguidu mai eskola ho kondisaun lanu tanba hemu tua sabu.

Prokuradór akuza arguidu kontra artigu 259 KP kona-ba krime danu agravadu ho moldura penál tinan 2 to'o tinan 8 prizaun.

Produsaun ba prova sira

Iha julgamentu, arguidu rasik konfesa faktu hotu iha akuzasaun no arrepende ona ba nia hahalok. Arguidu hatutan liután katak arguidu ho hakarak rasik halo aktu krime ne'e tanba iha momentu ne'ebá arguidu ho kondisaun lanu. Agora arguidu dezempregadu no laiha rendimentu fixu kada fulan no primeiravés mai hatan iha tribunál. Depoide akontesimentu ne'e, arguidu halo aproximasaun no iha Jullu 2017 arguidu hadia fali ona vidru ne'ebé arguidu estraga no husi

Diretór Eskola halo ona karta akordu hatama ona iha tribunál hodi aneksa hamutuk ba iha prosesu refere.

Tribunál presinde testemuña sira husi parte eskola no estudante balun tanba iha produsaun ba prova arguidu rasik konfesa faktu hotu iha akuzasaun.

Alegasaun final

Prokuradór konsidera arguidu provadu komete krime danu agravadu hasoru Estadu RDTL no tuir loloos arguidu tenke agradese ba Estadu tanba prepara ona fatin ne'ebé diak hodi arguidu bele aprende. Prokuradór haktuir tan katak arguidu halo krime ne'e ho livre, deliberada no konsentimente no aproveita oras aprediazen hodi hemu tua atu destrui no danifika patrimonia Estadu RDTL nian. Tanba ne'e, husu ba tribunál atu aplika pena ne'ebé hakerek ona iha artigu 259 KP ba arguidu.

Defeza husu ba tribunál atu aplika pena ne'ebé adekuaudu ba arguidu tuir nia sala ho konsiderasaun katak arguidu konfesa integralmente no arrepende ona ba nia hahalok, arguidu sei klosan no sei iha tempu atu hadia-an. Atualmente arguidu dezempregadu tanba depoisde remata estudu iha eskola nivel sekundáriu, arguidu buka serbisu maibé la hetan to'o ohin loron. Arguidu primeiravés halo krime no mai hatan iha tribunál no promete sei larepete hahalok hanesan iha futuru hasoru Estadu RDTL.

Desizaun

Tribunál konsidera katak arguidu la merese atu tuda rahun vidru eskola nian no pior liu-tan kuandu arguidu hemu lanu kedas tua-sabu iha uma mak foin ba eskola. Tanba ne'e, atu prevene krime hanesan akontese iha futuru tenke aplika pena ne'ebé adekuaudu ba arguidu. Iha tempu ne'eba arguidu hanesan estudante no tuir loloos arguidu tenke agradese ba Estadu RDTL tanba bele prepara fatin atu arguidu no ema seluk hodi aprende.

Tribunál mós konsidera katak arguidu konfesa faktu sira sein rezerva no arrepende ona nia hahalok. Arguidu sei klosan no laiha rendementu fixu kada fulan. Tribunál haktuir tan katak depoisde akontese no arguidu ho vontade rasik hadia hikas fali sasan ne'ebé arguidu estraga no arguidu mós foin primeiravés halo krime mai hatan iha tribunál.

Bazeia ba faktu provadu no sirkunstánsia agravante no atenuante hirak ne'e hotu, tribunál konklui prosesu ne'e no kondena arguidu ho pena prizaun tinan ida suspende ba tinan 1.

14. Krime ofensa ba integridade física simples ho natureza violénsia doméstika

Nú. Prosesu	: 0151/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Calisto Tout
Tipu pena	: Pena prizaun tinan 1 suspende ba tinan 1 fulan 6

Iha 15 Abril 2018, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu FT hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 26 Agosto 2018, maizumenus iha tuku 01:00 meudia, arguidu tuku lezada dala ida iha ibun no tuku tan dala ida iha hirus-matan no rakut lezada nia fuuk dala ida. Agresaun ne'e rezulta lezada sofre moras no kanek no ran iha ibun. Aktu ne'e akontese kuandu lezada husu osan ba arguidu atu lezada ba partisipa iha serimonia kultura husi parte lezada nian maibé arguidu dehan osan laiha. Kazu ne'e aneksa hamutuk ho relatóriu médiku husi Ospital Referral Oekusi no fotografia husi Polisia-VPU.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(b), 35 (b) no 36 LKVD.

Produsaun ba prova sira

Iha julgamentu, arguidu konfesa faktus hotu iha akuzasaun, arguidu mós deklarara katak arrepende ona nia hahalok. Antes ne'e arguidu serbisu funsionáriu iha edukasaun maibé depoisde akontese arguidu rezigna aan husi funsionáriu. Arguidu hatene kuandu baku ema nia isin bele hetan moras no kanek maibé arguidu komete nafatin krime ne'e. Arguidu primeiravés halo krime no ba hatan iha tribunál, iha oan na'in lima no dame malu ona ho lezada.

Tribunál presinde audisaun ba lezada nia deklarasaun inklui testemuña tanba iha produsaun ba prova arguidu rasik konfesa faktu hotu iha akuzasaun.

Alegasaun final

Prokuradór konsidera arguidu provadu komete krime violénsia doméstika hasoru nia feen bazeia ba konfisaun arguidu nian. Tanba ne'e husu ba tribunál atu kondena arguidu tuir artigu 145 KP. Iha parte seluk, defeza husu ba tribunál atu aplika pena adekuaudu ba arguidu tuir nia sala tanba arguidu konfesa faktu sira integralmente, arrepende ona nia hahalok, iha oan na'in lima, diak malu ona ho lezada no hela hamutuk nafatin hanesan família ida. Arguidu mós foin primeiravés halo krime mai hatan iha tribunál no laiha rendimentu fixu kada fulan.

Desizaun

Depoisde avalia faktu hotu, tribunál prova katak arguidu komete duni krime tuir faktu hotu iha akuzasaun. Bazeia ba prova sira ne'e hotu, tribunál kondena arguidu ho pena prizaun tinan ida suspende ba tinan ida fulan neen.

15. Krime ofensa ba integridade física simples ho natureza violénsia doméstika

Nú. Prosesu	: 0176/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena prizaun tinan 1 maibé suspende ba tinan 1 fulan 6

Iha 15 Abril 2018, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu TT hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 07 Outubru 2018, maizumenus iha tuku 16:00 lokraik, arguidu basa lezada dala ida iha hasan parte karuk no dada lezada iha rai no sama tan dala ida iha lezada nia kanotak no kauza lezada sofre moras. Kazu ne'e aneksa hamutuk ho relatóriu médiku husi PRADET no fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktus hotu iha akuzasaun. Arguidu deklarata katak arrepende ona nia hahalok, serbisu hanesan to'ós-na'in, laiha rendimentu fixu kada fulan no iha oan na'in neen. Arguidu haktuir tan katak nia lamerese atu halo agresaun ne'e hasoru nia feen. Maibé depoisde akontesementu sira dame malu kedas moris hamutuk nafatin iha uma ida hanesan feen-laen. Arguidu foin primeiravés halo krime mai hatan iha tribunál.

Tribunál presinde lezada nia deklarasaun, tanba iha produsaun ba prova arguidu rasik konfesa faktus hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no tuir lolos arguidu mak proteje lezada tanba feto laiha forsa atu halo reasaun hasoru arguidu. Prokuradór hanoin katak arguidu iha intensaun forte atu baku lezada tanba karik lezada sedauk tein maibé tuir loloos arguidu mós bele tein rasik. Tanba ne'e, atu prevene krime hanesan akontese tan iha futuru, husu ba tribunál atu kondena arguidu tuir artigu 145 KP.

Enkuantu defeza haktuir katak arguidu deklarata faktus hotu iha akuzasaun, arrepende ona ba nia hahalok no promete sei la komete tan krime hasoru lezada iha futuru no arguidu iha oan na'in neen. Defeza haktuir tan katak arguidu laiha rendimentu fixu kada fulan no foin primeiravés mai hatan iha tribunál no dame malu ona ho lezada. Tanba ne'e husu ba tribunál aplika pena ne'ebé kmaan ba arguidu tuir nia sala.

Desizaun

Depoisde avalia faktus sira hotu, tribunál prova katak arguidu komete duni krime tuir faktus sira iha akuzasaun prokuradór nian. Bazeia ba faktus provadu sira ne'e, tribunál kondena arguidu ho pena prizaun tinan ida suspende ba tinan ida fulan neen.

16. Krime ofensa ba integridade física simples ho natureza violénsia doméstika

Nú. Prosesu	: 0048/18.OEBCN
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena admoestasaun

Iha 16 Abril 2018, Tribunál Distritál Oekusi prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu SS hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 06 Setembru 2018, maizumenus iha tuku 19:00 kalan, arguidu basa dala ida iha lezada nia hasan karuk no kauza lezada sofre moras. Aktu ne'e akontese bainhira lezada baku hela sira nia oan feto nune'e arguidu halo agresaun hasoru fali lezada. Kazu ne'e aneksa hamutuk ho relatóriu médiku husi Centru Saúde Baocnana no fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklarasaun katak arrepende ona nia hahalok. Arguidu serbisu hanesan to'os-na'in, laiha rendimentu fixu kada fulan no arguidu hatene katak bainhira baku ema nia isin bele hetan moras no kanek. Arguidu primeiravés halo krime no mai iha tribunál no iha oan na'in neen no dame malu ona ho lezada.

Tribunál presinde lezada nia deklarasaun inklui testemuña tanba iha produsaun ba prova arguidu rasik konfesa faktu hotu iha akuzasaun.

Alegasaun final

Prokuradór konsidera arguidu provadu komete krime violénsia doméstika hasoru nia feen bazeia ba konfisaun arguidu nian. Tanba ne'e husu ba tribunál atu kondena arguidu tuir artigu 145 KP. Iha parte seluk, defeza husu ba tribunál atu aplika pena ne'ebé kmaan ba arguidu tanba arguidu rasik konfesa faktu integralmente, arrepende ona nia hahalok, iha oan na'in neen, diak malu ona ho lezada no kontinua hela hamutuk hanesan família ida. Arguidu mós foin primeiravés halo krime mai hatan iha tribunál no laiha rendimentu fixu kada fulan. Agresaun ne'e mosu tanba atu hapara lezada nia agresaun hasoru sira nia oan feto.

Desizaun

Depoizide avalia faktu hotu, tribunál prova katak arguidu komete duni krime tuir faktu hotu iha akuzasaun. Bazeia ba prova sira ne'e hotu, tribunál kondena arguidu ho pena admoestasaun no husu ba arguidu atu la komete tan krime hanesan iha futuro. Bainhira arguidu komete krime hanesan iha futuro, tribunál sei kondena arguidu ho pena todan liu.

17. Krime ofensa ba integridade fízika simples ho natureza violénsia doméstika

Nú. Prosesu	: 0047/18.OEBCN
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena prizaun fulan 6 suspende ba tinan 1

Iha 16 Abril 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida BCN hasoru nia oan feto, iha Distritu Oekusi.

Akuzasaun Prokuradór

Prokuradór akuza katak iha 06 Setembru 2018, maizumenus iha tuku 19:00 kalan, arguida uza katana nia knuk baku lezada dala ida iha kotuk laran no dala ida iha lezada nia kanuruk hodi rezulta lezada sofre bubu no moras. Aktu ne'e akontese kuandu arguida haruka lezada atu fó han fahi maibé lezada lakohi ba fó-han fahi. Kazu ne'e aneksa hamutuk ho relatóriu médiku husi Sentru Saúde Baocnana no fotografia husi Polísia-VPU.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(c), 35 (b) no 36 LKVD.

Produsaun ba prova sira

Arguida konfesa integralmente ba faktus hotu iha akuzasaun. Arguida deklara katak arrepende ona nia hahalok, serbisu hanesan to'ós-na'in, laiha rendimentu fixu kada fulan no iha oan na'in neen. Depoisde akontesimentu sira dame malu kedas. Arguida foin primeiravés halo krime mai hatan iha tribunál.

Tribunál presinde lezada nia deklarasaun, tanba iha produsaun ba prova arguida konfesa faktus hotu iha akuzasaun.

Alegasaun final

Prokuradór konsidera arguida provadu komete krime hasoru lezada bazeia ba konfisaun arguida nian. Tanba ne'e, atu prevene krime hanesan akontese tan iha futuru, husu ba tribunál atu kondena arguida tuir artigu 145 KP.

Defeza husu ba tribunál atu aplika pena ne'ebé kmaan ba arguida ho konsiderasaun katak iha produsaun ba prova arguida rasik konfesa faktus hotu sein rezerva, arrepende ona ba nia hahalok, foin primeiravés halo krime mai iha tribunál. Aleinde ne'e arguida ho lezada diak malu ona, promete ba tribunál katak sei la baku tan nia-oan sira iha futuru.

Desizaun

Depoisde avalia faktus sira hotu, tribunál prova katak arguida komete duni krime tuir faktus sira iha akuzasaun prokuradór nian. Bazeia ba faktus provadu sira ne'e, tribunál kondena arguida ho pena prizaun fulan neen suspende ba tinan ida.

18. Krime ofensa ba integridade fízika simples ho natureza violénsia doméstika

Nú. Prosesu	: 0058/18.OEPMK
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Calisto Tout
Tipu pena	: Absolve

Iha 16 Abril 2018, Tribunál Distritál Oekusi prezide julgamentu ba krime ofensa ba integridade fizika simples ho natureza violénsia doméstika ne'ebé envolve arguida LMS (lezadu nia feen bo'ot), ISA no LT nu'udar viziñu hasoru lezadu DS, iha Distritu Oekusi.

Akuzasaun Prokuradór

Prokuradór akuza katak iha 19 Setembru 2018, maizumenus iha tuku 17.00 lokraik, arguida ISA ho arguida LT hamutuk kaer metin lezadu hafoin lezadu nia feen LMS tuku dala barak iha lezadu nia isin lolon no tuda dala ida ho batakun rahun iha liman sikun parte loos no kauza lezadu sofre kanek, bubu no moras. Aktu ne'e akontese kuandu lezadu hola tan feto ki'ik no mai foti sasan iha nia feen bo'ot (LMS) nia uma hodi faan no hetan osan atu lori fó han nia feen kiik. Kazu ne'e aneksa hamutuk ho relatóriu médiku husi Ospital Referral Oekusi no fotografia husi Polísia-VPU.

Prokuradór akuza arguida ISA no LT kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa no akuza arguida LMS kontra artigu 145 KP no konjuga ho artigu 2, 3(a), 35 letra (b) no artigu 36 LKVD.

Antes julgamentu, tribunál halo tentativa konsiliaun no lezadu hakarak dame malu de'it ho nia viziñu sira no husi parte arguida sira aseita ho pedidu husi lezadu hakarak dame-malu de'it. Tanba ne'e tribunál omologa pedidu dezistensia keixa hasoru arguida sira no absolve arguida sira husi primeira instánsia ne'e. Hafoin tribunál kontinua fali ba julgamentu hasoru arguida LMS relasiona ho krime hasoru lezadu nu'udar nia la'en.

Produsaun ba prova sira

Arguida konfesa faktu sira parsialmente katak loos duni iha lokraik ne'e sira diskute malu maibé la'os baku lezadu. Arguida diskute malu ho lezadu tanba lezadu moris hamutuk fali ho feto seluk no hakarak foti morten no sasan sira seluk iha arguida nia uma hodi faan lori osan fó ba nia feen kiik. Arguida haktuir tan katak iha momentu ne'ebá, arguida lahare nia viziñu sira kaer metin lezadu hodi arguida avontade halo agresun hasoru lezadu. Arguida deklarara katak nia la tuku no la uza batakun rahun tuda lezadu tanba arguida mós tauk mane hanesan bele baku hasoru arguida. Arguida ho lezadu moris separadu ona maibé dalaruma mak lezadu ba iha uma hodi foti sasan sira ne'ebé uluk sira na'in rua hola hodi faan fali ka halo kontratu buka osan. Arguida iha oan na'in neen no antes ne'e mai ona iha tribunál tanba halo krime hanesan no hetan pena admoestrasaun.

Lezadu konfirma katak testemuña sira la kaer lezadu maibé sira ida-idak iha liur hakilar, ne'ebé hanesan asu karik besik atu tata ona lezadu no iha loron ne'eba só arguida mak tuku lezadu no lori batakun rahun tuda ba lezadu kona iha nia liman sikun parte loos kauza kanek. Lezadu hanesan veteranu ida ho rendimentu kada fulan US\$270.00. Lezadu hatutan katak agora moris separadu ho nia feen bo'ot no moris hamutuk fali ho nia feen ki'ik maibé sira sei iha dependénsia ekonómia ba malu.

Testemuña ISA no LTO nu'udar viziñu depoimenta katak loos duni katak sira nia iha fatin akontesementu, maibé testemuña la arbiru atu kaer ema seluk nia laen no testemuña la hakilar hasoru lezadu. Testemuña sira so hare de'it tanba rona lezadu ho arguida sira deskute malu de'it no lahare arguida tuku no uza batakun rahun tuda lezadu.

Alegasaun finál

Prokuradór hanoin katak iha diferensa faktu sira ne'ebé hakerek iha akuzasaun no deklarasaun parte sira durante iha produsaun ba prova, tanba iha produsaun ba prova lezadu rasik deklarasaun katak testemuña na'in rua la kaer metin lezadu. Maibé iha momentu inkéritu iha prokuradór, lezadu deklarasaun katak testemuña na'in rua kaer metin lezadu hafoin arguida halo agresaun hasoru lezadu. Tanba ne'e, prokuradór husu ba tribunál atu halo desizaun tuir konviksaun tribunál nian.

Defeza husu ba tribunál atu absolve arguida husi aktu krime refere ho konsiderasaun katak iha produsaun ba prova arguida deklarasaun ho onestu no físicamente lezadu mak iha forsa liu arguida. Pior liután iha eskritoriu prokuradór nian, lezadu deklarasaun katak testemuña na'in kaer metin lezadu hafoin arguida halo agresaun hasoru lezadu. Maibé iha produsaun ba prova lezadu konfirma katak testemuña sira la kaer metin lezadu tanba sira ida-idak hamrik dook mak hateke de'it ba lezadu ho arguida sira diskute malu de'it.

Desizaun

Bazeia ba faktu hirak ne'ebé prodús durante julgamentu, tuirmai tribunál konklui katak la iha prova suficiente atu kondena arguida tanba tantu lezadu no testemuña sira ninia deklarasaun la han-malu no konsistente, nune'e tribunál absolve arguida hosi prosesu ne'e.

19. Krime ofensa ba integridade física simples ho natureza violénsia doméstika

Nú. Prosesu : 0171/18.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun tinan 2

Iha 22 Abril 2018, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu PNC hasoru nia feen NE, iha Distritu Oekusi.

Akuzasaun Prokuradór

Prokuradór akuza katak iha 29 Setembru 2018, maizumenus iha tuku 07.00 dadeer, arguidu basa dala ida iha lezada nia hasan loos no kauza lezada monu tun ba rai no lezada baku nia matan fukun loos ba fatuk nune'e kauza lezada sofre bubu no moras. Arguidu kontinua tebe tan lezada dala rua iha kanotak karuk no fai lezada nia ulun ba didin lolon uma nian, rakut lezada nia fuk dala ida nune'e rezulta lezada hetan kanek no sofre moras. Aktu ne'e akontese kuandu arguidu fila husi serimonia kultural ho kondisaun lanu tanba hemu tua sabu. Kazu ne'e aneksa hamutuk ho relatóriu médiku husi PRADET no fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35 (b) no 36 LKVD.

Produsaun ba prova sira

Iha julgamentu, arguidu konfesa integralmente ba faktus hotu iha akuzasaun. Arguidu deklarasaun katak arrepende ona nia hahalok, serbisu hanesan to'ós-na'in no laiha rendimentu fixu kada fulan no iha oan na'in tolu. Arguidu konsiente katak baku ema nia isin bele kauza moras no kanek

maibé arguidu kontinua halo agresaun nafatin hasoru nia feen. Arguidu dame malu ona ho lezada moris hamutuk nafatin nu'udar família ida. Antes ne'e, iha tinan 2014, tribunál kondena ona arguidu ho pena prizaun tinan 3 maibé suspende ba tinan 4 tanba provadu komete krime tratus ba konjuje hasoru lezada.

Tribunál presinde lezada nia deklarasaun inklui testemuña nia depoimentu tanba iha produsaun ba prova arguidu rasik konfesa faktu hotu iha akuzasaun.

Alegasaun final

Prokuradór konsidera arguidu lahatudu nia arrendimentu ba nia hahalok mezmú antes ne'e tribunál fó tempu ne'ebé naruk tebes atu hadia nia-aan iha liur, maibé arguidu nafatin laiha mudansa. Prokuradór haktuir tan katak fízikamente arguidu mak iha forsa liu lezada no tuir lolos arguidu mak tenke proteje lezada husi kualkér forma aktu krime oioin. Tanba ne'e, atu prevene krime hanesan akontese tan iha futuru, husu ba tribunál atu kondena arguidu ho pena prizaun tuir artigu 145 KP.

Defeza husu ba tribunál atu kondena arguidu ho pena ne'ebé kmaan tuir arguidu nia sala tanba arguidu rasik iha kolaborasaun diak ho tribunál hodi konfesa faktu hotu iha akuzasaun, arrende ona nia hahalok, iha oan na'in 3 no diak malu ona ho lezada moris hamutuk nafatin hanesan feen-laen iha uma ida no arguidu mak iha responsabilidade ba iha nia família. Defeza reforsa liutan katak mezmú arguidu iha ona antesidente kriminál maibé defeza hanoin bele aplika mós ho regra ba konduta ba arguidu apresenta aan mai tribunál ka polísia kada fulan no la bele ba iha prizaun.

Desizaun

Tribunál prova faktu sira katak arguidu ho lezada ba duni iha serimonia kulturál no iha ne'ebá arguidu hemu tua-sabu to'o lanu. Depoide fila to'o iha uma no arguidu halo kedas agresaun fízika hasoru lezada tuir faktu sira hotu iha akuzasaun bazeia ba produsaun ba prova, arguidu rasik konfesa faktu hotu sein rezerva. Tribunál konsidera katak arguidu laiha arrendimentu ba krime ida antes, arguidu halo aktu hirak ne'e ho livre no kruel hasoru nia feen. Arguidu hatene katak komete aktu hirak ne'e kontra lei no hatene bele halo kanek lezada nia isin maibé arguidu ho vontade rasik komete aktu hirak ne'e hasoru nia feen.

Antes ne'e, iha Outubru 2013, arguidu halo krime maus tratus ba kónjuje hasoru nia feen no iha 25 Jullu 2014, tribunál kondena arguidu ho pena prizaun tinan 3 suspende ba tinan 4 tanba provadu arguidu komete krime maus tratus ba kónjuje hasoru nia feen.

Tribunál prova mós katak arguidu nia suspensaun ne'e remata ona maibé foin liu fulan rua no arguidu repete fali krime hasoru nafatin nia feen no tribunál konsidera arguidu nia hahalok ne'e hanesan pesoal violentu. Tribunál mós konsidera katak arguidu iha oan na'in tolu no dame malu ona ho lezada moris hamutuk nafatin iha uma ida, kolabora diak ho tribunál tanba iha produsaun ba prova arguidu rasik konfesa faktu hotu iha akuzasaun no arguidu laiha rendimentu fixu kada fulan tanba serbisu hanesan to'os-na'in.

Bazeia ba faktus provadu sira ne'e hotu no sirkunstánsia atenuante no agravante hirak ne'e, tribunál konklui prosesu ne'e no kondena arguidu ho pena efetiva tinan rua.

20. Krime ofensa ba integridade fízika simples ho natureza violénsia doméstika

Nú. Prosesu : 0056/18.OEBCN
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun tinan 2 suspende ba tinan 2

Iha 25 Abril 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu PB hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 16 Setembru 2018, maizumenus iha tuku 06.00 dadeer, arguidu tafui kaben ba lezada nia oin dala ida no kaer lezada niaibun hodi hatama nia liman fuan ba lezada niaibun laran kauza lezada sofre moras. Arguidu kontinua dada tun lezada husi baki leten no rezulta lezada hetan moras, kanek iha ain tur no bubu. Aktu ne'e akontese kuandu arguidu dehan ba lezada atu ba koa hare iha Noebesi maibé lezada rejeita ba koa háre. Kazu ne'e aneksa mós ho relatóriu médiku husi Sentru Saude Baocnana no fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35 (b) no 36 LKVD.

Produsaun prova

Arguidu konfesa faktu sira parsialmente katak lezada mak tafui kaben uluk ba arguidu ho maneira hanesan provokasaun hafoin la'o sae to'o iha baki leten mak arguidu kaer iha lezada nia lipa dada tun lezada husi baki leten no rezulta lezada nia ain tur kanek. Maibé arguidu rejeita la uza liman hatama ba iha lezada niaibun laran. Aguidu arrepente ona ba nia hahalok no hatene hahalok hanesan ne'e kontra lei. Depoisde akontese arguidu abandona lezada ho nia oan sira ate data dilijensia mak foin sira dame malu no moris hamutuk fali to'o agora. Arguidu foin primeiravés mai iha tribunál, iha oan na'in haat, no rendimentu kada fulan la-iha, tanba arguidu serbisu hanesan to'os-na'in.

Entretantu lezada mantein ho faktus sira hotu iha akuzasaun maibé konfirma de'it katak loos duni lezada sai husi uma laran no lezada mak tafui kaben uluk maibé la'os tafui kaben ba arguidu nia isin tanba iha momentu ne'ebá lezada mama hela bua ho malus.

Alegasaun final

Prokuradór haktuir katak arguidu tenta atu bosok tribunál hodi konfesa faktu sira parsialmente maibé prokuradór fiar katak arguidu komete duni ofensa integridade fízika simples konjuga ho LKVD. Prokuradór reforsa liután katak arguidu iha intensaun maka'as atu halo agresaun hasoru lezada mezmu arguidu hatene katak fízikamente lezada nia forsa la bele hasoru arguidu. Tanba ne'e husu ba tribunál atu kondena arguidu tuir pena iha artigu 145 KP.

Enkuantu defeza solisita ba tribunál atu aplika pena ne'ebé kmaan tuir arguidu nia sala tanba arguidu konfesa faktu balun no arrepende ona nia hahalok. Defeza reforsa tan katak arguidu promete sei la halo tan krime hasoru nia membru família ka ema seluk no arguidu iha kolaborasaun diak ho tribunál. Arguidu iha oan na'in haat no serbisu hanesan to'os-na'in, nune'e laiha rendimentu fixu kada fulan.

Desizaun

Depoisde avalia faktu sira ne'ebé prodús durante julgamentu, tribunál prova katak arguidu provadu komete duni krime hasoru lezada. Bazeia ba faktu provadu hirak ne'e no sirkunstánsia asociadu sira hotu, tribunál kondena arguidu ho pena prizaun tinan rua suspende ba tinan rua.

21. Krime ofensa ba integridade fízika simples ho natureza violénsia doméstika

Nú. Prosesu : 0045/18.OEBCN
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun tinan 1 suspende ba tinan 1

Iha 25 Abril 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu TNC hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 19 Agostu 2018, maizumenus iha tuku 19:00 kalan, arguidu basa lezada dala ida iha hasan loos no dala ida iha hasan karuk. Arguidu kontinua tuku tan lezada dala rua iha reen-toos. Agresaun fízika ne'e rezulta lezada hetan mean, bubu no sofre moras. Kazu ne'e aneksa hamutuk ho relatóriu médiku husi Sentru Saúde Baocnana no fotografia husi Polísia-VPU.

Prokuradór akuza arguidu kontra 145 KP kona-ba krime ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35 (b) no 36 LKVD.

Produsaun ba prova sira

Arguidu konfesa integralmente ba faktu sira hotu iha akuzasaun no arguidu mós arrepende ona nia hahalok. Arguidu serbisu hanesan to'os-na'in laiha rendimentu fixu kada fulan no iha oan na'in rua. Arguidu reforsa tan katak dame malu ona ho lezada no moris hamutuk fali ona hanesan feen-laen iha uma ida. Arguidu foin primeiravés halo krime mai hatan iha tribunál.

Tribunál presinde audisaun ba lezada nia deklarasaun, tanba iha produsaun ba prova arguidu konfesa faktu hotu iha akuzasaun.

Alegasaun final

Prokuradór konsidera arguidu provadu komete krime hasoru lezada bazeia ba konfisaun arguidu nian. Prokuradór haktuir katak arguidu nia hahalok ne'e prenze duni elementu krime ofensa ba integridade fízika simples ho natureza violénsia doméstika no krime hirak ne'e maioria akontese

iha Rejiaun Oekusi kompara ho munisípiu sira seluk. Prokuradór realsa katak arguidu iha intensaun maka'as atu halo agresaun fízika hasoru lezada no tuir loloos arguidu mak tenke proteje nia membru família sira husi kualkér aktu ruma. Tanba ne'e husu ba tribunál atu kondena arguidu tuir artigu 145 KP.

Iha parte seluk defeza husu ba tribunál atu kondena arguidu ho pena ne'ebé kmaan tanba arguidu konfesa integralmente ba faktu hotu iha akuzasaun, arrepente ona nia hahalok, iha oan na'in rua no diak malu ona ho lezada. Aleinde ne'e, arguidu mak iha responsabilidade ba nia membru família sira hotu no arguidu sei iha tempu para hadia-an no promete ona ba tribunál katak sei larepete tan hahalok hanesan iha futuro.

Desizaun

Depoisde avalia faktu no sirkunstánsia argravante no atenuante hirak-ne'e hotu no tribunál kondena arguidu ho pena prizaun tinan ida suspende ba tinan ida.

22. Krime ofensa ba integridade fízika simples ho natureza violénsia doméstika

Nú. Prosesu : 0126/18.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun tinan 1 suspende ba tinan 1

Iha 26 Abril 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MN hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 24 Jullu 2018, maizumenus iha tuku 19.00 kalan, arguidu tebe dala ida iha lezada nia keixu ka hasan loos parte okos no kauza lezada hetan bubu, mean no sofre moras. Aktu ne'e akontese kuandu arguidu fila husi serimonia kulturál ida ho kondisaun lanu. Kazu ne'e aneksa mós ho relatóriu médiku husi Ospital Referal Oekusi no fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfirma faktu hotu iha akuzasaun prokuradór nian no arrepente ona nia hahalok. Arguidu hatene hahalok hanesan ne'e kontra lei no ladiak maibé arguidu komete nafatin agresaun hasoru lezada nu'udar nia feen rasik. Depoisde akontese arguidu ho lezada dame malu kedas no moris hamutuk nafatin iha uma ida no arguidu iha oan na'in tolu. Arguidu mós foin primeiravés halo krime no mai iha tribunál, la iha rendimentu fíksu kada fulan, tanba arguidu serbisu hanesan to'os-na'in.

Tribunál presinde lezada nia deklarasaun tanba arguidu konfirma faktu hotu iha akuzasaun prokuradór nian.

Alegasaun final

Prokuradór konsidera arguidu provadu prense duni elementu krime ofensa ba integridade fízika simples. Prokuradór argumenta katak arguidu iha intensaun maka'as atu halo agresaun hasoru lezada mezmú arguidu hatene hela katak fízikamente lezada la bele halo reasaun hasoru arguidu. Tanba ne'e husu ba tribunál atu kondena arguidu tuir pena ne'ebé hakerek ona iha artigu 145 KP.

Enkuantu defeza solisita ba tribunál atu aplika pena ne'ebé kmaan tuir arguidu nia sala ho konsiderasaun katak durante produsaun ba prova arguidu konfirma faktu hotu iha akuzasaun no arrepende ona ba nia hahalok. Defeza reforsa tan katak arguidu promete sei la halo tan krime hasoru nia membru família ka ema seluk no kolabora diak ho tribunál. Arguidu mós deklarata tan katak iha oan na'in tolu no serbisu hanesan to'os-na'in, no laiha rendimentu fixu kada fulan.

Desizaun

Tribunál prova katak arguidu halo duni krime ofensa ba integridade fízika simples ho natureza violénsia doméstika hasoru de'it lezada nu'udar arguidu nia feen rasik ne'ebé konfirma faktu hotu husi arguidu rasik, arguidu halo agresaun ne'e hasoru fetu ne'ebé fízikamente la bele halo reasaun hasoru arguidu, arguidu mós iha intensaun maka'as atu halo agresaun hasoru lezada no foin primeiravés halo krime mai hatan iha tribunál, arguidu arrepende ona ba nia hahalok no iha oan na'in tolu no laiha rendimentu fixu kada fulan tanba serbisu hanesan to'os na'in.

Depoizde avalia faktus no sirkunstánsia agravante no atenuante hirak-ne'e hotu, no tribunál kondena arguidu ho pena prizaun tinan ida suspende ba tinan ida.

23. Krime ofensa ba integridade fízika simples ho natureza violénsia doméstika

Nú. Prosesu	: 0055/18.OEBCN
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Calisto Tout
Tipu pena	: Pena admoestasaun

Iha 26 Abril 2019, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu EM hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 20 Setembru 2018, maizumenus iha tuku 20:00 kalan, arguidu basa dala ida iha lezada-nia hasan karuk no rezulta lezada nia hasan karuk hetan mean no sofre moras. Aktu ne'e akontese kuandu arguidu foin fila husi to'os no lezada haruka arguidu atu ba kuru bee. Kazu ne'e aneksa hamutuk ho relatóriu médiku husi Sentru Saúde Baocnana no fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu hotu iha akuzasaun no arguidu mós arrepende ona nia hahalok. Arguidu haktuir tan katak arguidu foin fila husi to'ós, no lezada haruka kedas arguidu atu ba kuru bee, maibé arguidu dehan katak nia presiza deskansa oituan lai antes ba kuru bee. Maibé lezada hakarak arguidu tenke ba kuru ona bee tanba momentu ne'e isin rua hela. Arguidu hatene kuandu baku nia membru família sira bele hetan kanek ka moras maibé arguidu komete nafatin krime ne'e hasoru nia feen. Arguidu serbisu hanesan to'os-na'in, laiha rendimentu fixu kada fulan no iha oan na'in haat. Arguidu reforsa tan katak dame malu ona ho lezada no moris hamutuk fali ona hanesan feen-laen iha uma ida, foin primeiravés halo krime no mai hatan iha tribunál.

Entretantu lezada konfirma faktu hotu iha akuzasaun prokuradór nian no deklarasaun husi arguidu rasik katak iha momentu ne'e lezada isin rua hela no kuandu arguidu fila husi to'os foin to'o iha uma no lezada hakarak arguidu atu ba kuru ona bee. Lezada mós konfima arguidu nia deklarasaun katak arguidu husu atu hein lai oituan no pois mak arguidu ba kuru bee.

Alegasaun final

Prokuradór konsidera katak arguidu provadu komete krime hasoru lezada bazeia ba konfisaun arguidu nian ne'ebé konfirma mós husi lezada rasik. Prokuradór haktuir tuir loloos arguidu mak tenke pasiensia tanba iha momentu ne'e lezada isin rua hela no krime hirak ne'e maioria akontese iha Regiaun Oekusi kompara ho munisípiu sira seluk. Tanba ne'e husu ba tribunál atu kondena arguidu tuir artigu 145 KP.

Iha parte seluk defeza husu ba tribunál atu kondena arguidu ho pena ne'ebé adekuaudu tanba arguidu konfesa integralmente ba faktu hotu iha akuzasaun no kolabora diak ho tribunál. Arguidu arrepende ona nia hahalok, iha oan na'in haat no diak malu ona ho lezada, arguidu mak responsavel ba família sira hotu no arguidu sei iha tempu para hadia-aan no promete ona ba tribunál katak sei la repete tan hahalok hanesan iha futuru.

Iha arguidu nia deklarasaun ikus katak depoisde akontese lezada ho arguidu dame malu kedas. Arguidu deklara katak nia hadomi loos nia feen no sira sei fiar malu nafatin no respeita malu nafatin hanesan saida mak sira na'in rua futu lia tiha ona iha marmak nia oin iha momentu sira simu sakramentu madrimonia.

Desizaun

Depoisde avalia faktu sira ne'ebé prodús durante julgamentu no sirkunstánsia argravante no atenuante relevante sira, tribunál kondena arguidu ho pena admoestasaun.

Atu hetan informasaun kompleitu, favor kontaktu:

Casimiro dos Santos
Diretór Interinu JSMP

Diresaun e-mail: santos.cas76@gmail.com
Website: <http://jsmp.tl/>